

PRAKATA

**MENTERI KEWANGAN
MALAYSIA**

Negara kini berada di atas landasan pemulihan kukuh ke arah fasa endemik COVID-19 yang ditunjukkan melalui pertumbuhan ekonomi yang lebih baik. Aktiviti domestik kembali rancak, perniagaan secara amnya telah pulih serta pergerakan barangan dan kehidupan orang ramai kembali normal. Perkembangan yang menggalakkan ini dicerminkan oleh pertumbuhan KDNK bagi tiga suku tahun berturut-turut dengan KDNK pada suku kedua 2022 mencatat sebanyak 8.9%. Insya-Allah, momentum ini akan berterusan sehingga akhir tahun disokong oleh pelaksanaan dasar Kerajaan yang responsif, bertanggungjawab dan bersifat pembaharuan demi menjamin kemakmuran negara kita.

Walau bagaimanapun, perkembangan ekonomi global seperti konflik geopolitik yang berterusan, gangguan rantaian bekalan global yang berpanjangan dan kenaikan harga barangan pengguna telah meningkatkan risiko terhadap pemulihan ekonomi Malaysia. Kerajaan telah menambah perbelanjaan subsidi pada tahun ini untuk mengurangkan kos sara hidup rakyat yang meningkat akibat tekanan inflasi. Tindak balas dasar Kerajaan yang proaktif dalam menyediakan program penstabilan pekerjaan seperti subsidi upah, insentif pengambilan pekerja dan inisiatif pembangunan kemahiran juga telah menambah baik pasaran buruh.

Prospek pertumbuhan ekonomi Malaysia pada 2023 kekal memberangsangkan meskipun berdepan dengan cabaran global yang ketara seperti tekanan inflasi, ketidaktentuan ekonomi serta perubahan iklim. Justeru, Kerajaan akan terus mengukuhkan sokongan fiskal dan meneruskan pendirian fiskal yang mengembang untuk merangsang aktiviti ekonomi bagi mengekalkan momentum pertumbuhan KDNK yang diunjur antara 4% - 5% pada 2023.


Dasar fiskal Malaysia yang responsif dan bertanggungjawab telah membolehkan Kerajaan menerajui pembangunan ekonomi negara secara konsisten dan mengatasi cabaran COVID-19. Bajet 2023 dirangka untuk menyediakan persekitaran yang kondusif dan memastikan keseimbangan antara keperluan ekonomi dengan konsolidasi fiskal bagi menggalakkan pertumbuhan ekonomi, memupuk agenda kemampanan dan meningkatkan kesejahteraan rakyat. Objektif tersebut dapat dicapai dengan memastikan keseimbangan antara perbelanjaan berhemat di samping mencorak masa hadapan melalui rangka kerja fiskal yang pragmatik.

Kerajaan mengutamakan pemulihan pada 2022 dan membina momentum pembaharuan pada 2023 bagi meningkatkan daya saing dan daya tahan negara. Strategi fiskal Kerajaan adalah untuk memperkukuh pemulihan dan menyokong pembaharuan sebagai objektif utama dalam memacu Keluarga Malaysia ke arah kemampanan daya tahan sosioekonomi. Tindak balas dasar Kerajaan juga akhirnya bertujuan menggalakkan tanggungjawab bersama pada setiap peringkat masyarakat dalam memperkasa komuniti perniagaan, masyarakat sivil dan rakyat untuk bekerjasama bagi membina Malaysia yang lebih baik dan mampan.

Kerajaan akan meneruskan usaha konsolidasi fiskal melalui pelbagai langkah termasuk menambah baik tadbir urus fiskal, memperluas asas hasil dan mengoptimumkan perbelanjaan. Langkah seperti Strategi Hasil Jangka Sederhana dan Semakan Semula Perbelanjaan Awam akan menyediakan ruang fiskal tambahan manakala Akta Tanggungjawab Fiskal bakal memperkukuh tadbir urus fiskal dan membolehkan Kerajaan melaksanakan langkah kitaran balas dan mengekalkan daya tahan ekonomi.

Kerajaan akan terus menyediakan dasar yang menyokong pertumbuhan ekonomi dan pewujudan pekerjaan untuk rakyat di samping melaksanakan pembaharuan dalam memastikan kemampanan fiskal jangka masa panjang. Kita komited untuk mengekalkan hutang statutori Kerajaan Persekutuan di bawah had statutori 65% kepada KDNK. Kerajaan juga akan melaksanakan strategi pengurusan hutang yang bertujuan untuk memastikan ruang fiskal mencukupi bagi mengurangkan impak kejutan ekonomi atau situasi luar jangka.

Walaupun berdepan cabaran global, Kerajaan bertekad untuk memperkukuh kedudukan fiskal secara responsif, bertanggungjawab dan bersifat pembaharuan dalam melaksanakan dasar negara. Tinjauan Fiskal dan Anggaran Hasil Kerajaan Persekutuan 2023 mencerminkan komitmen Kerajaan untuk meningkatkan kecekapan hasil dan perbelanjaan bagi mengurus sumber negara secara bertanggungjawab dan memastikan penyampaian yang berkesan ke arah pertumbuhan mampan, saksama dan inklusif demi kemakmuran #KeluargaMalaysia.



TENGGU DATUK SERI UTAMA ZAFRUL TENGGU ABDUL AZIZ

7 Oktober 2022